

գարշուփին. բայց կարի գարուագիտութիւն: 5 Դարծեալ ինքն իգանայր այլոց, եւ այսպէս մըմկեալ թաւալեալ էր:

6 Եւ երբեմն իբրեւ զգաց մայր Նորա գարուագիտութիւնն, եւ ոչ կարացեալ համբերել պարսաւանացն վատանուանութեանն, ասէ ցտենեկապան որդւոյն իւրոյ, թէ յորժամ նա խնդրեսցէ ի պղծութիւն գարսն՝ ընդ որ սովորն է անկանել, դուք զիս ի ներքս կոչեսցիք: 7 Յորժամ պատանեակն Պապ ինքն ընդ անկողին մտեալ՝ խնդրէր գարսն ի պղծութիւն, եմուտ մայր Նորա եւ նստաւ զառաջեաւ Նորա՝ իւր որդւոյն: 8 Ապա սկսաւ ճչել վայել պատանեակն, եւ ասէ ցմայր իւր. Յարիցես գնացես ի բաց, զի մեռանիմ խորովիմ կսկծիմ պայթիմ¹, թէ ոչ յարիցես գնացես ի տանես: 9 Իսկ մայրն ասէ՝ թէ ոչ գնացեալ էլից ի տանէ աստի: 10 Իսկ նա հաղ քան զհաղ ճչէր, բազմացուցանէր զվայելն: 11 Իսկ մայրն նայեցեալ տեսանէր աչաւք իւրովք անձք սպիտակք, զի պատեալք էին զգահոյիցն ոտամբք, եւ ճապատէին ի վերայ պատանեկին Պապայ, մինչ դեռ ընգողմանեալ էր նա. կայր ի մահիճսն, վայր եւ խնդրէր զպատանեակսն ընդ որ սովորն էր գիտանալ: 12 Իսկ մայրն գիտացեալ յիշեաց զայն, որոց ի ծննդեանն նուիրեաց զորդին իւր. գիտաց թէ Նոթա են, որ ի կերպարանս անձիցն ճապատէին զորդւովն իւրով. յարտասուս հարեալ՝ ասաց. Վա՛յ ինձ, որդեակ իմ. զի քեզ տազնապ էր, եւ ես ոչ գիտէի: 13 Յարուցեալ գնաց եթող զտեղին, կատարել զպետս ցանկութեանն: 14 Եւ այսպէս դիւաւք վարեալ, յայսպիսի գործս զամենայն աւուրս կենաց իւրոց ըմբռնեալ Պապն որդին Արշակայ, մինչ եհաս ի թագաւորութիւնն, մինչեւ ի մահ իւր:

ԳԼՈՒԽ ԽԵ.

1 Յաղագս Սակստան անդերձապետի, որ առաքեցաւ ի Շապիոյ թագաւորէն

Պարսից չորեքհարիւր հազարաւ, եւ փոխոյց եւս զնա Վասակ զաւրավարն Յայոց:

2 Ապա յետ այսորիկ ժողովեաց թագաւորն Պարսից Շապուհ զզաւրս իւր, եւ հազարս չորեքհարեր. եւ Սակստան անդերձապետ զաւրագլուխ նոցա: 3 Ապա խաղացին գնացին ի կողմանս Յայոց. եկին ծաւալեցան ճակատեցան ընդ թագաւորութեանն Յայոց Արշակայ: 4 Ապա ի մի վայր եկեալք ամենայն մեծամեծք նախարարացն Յայոց, խորհուրդ խորհէին. քանզի ոչ առնուին յանձն երբէք, թէ թագաւորն Արշակ մտցէ ընդ Նոսա ի պատերազմ: 5 Ապա զաւրավարն Վասակ, հանդերձ ամենայն մեծամեծաւքն եւ նախարարաւքն ամենայն Յայոց մեծաց, հարկանէր սատակէր զամենայն զաւրսն Պարսից: 6 Եւ սպանանէր Սակստան անդերձապետն. բայց միայն ապրէր Մերուժանն Արծրունի փախուցեալ:

¹ Օրինակ մի յաւելու՝ ճայթիմ